

Tillaga skóla- og frístundaráðsfulltrúa Samfylkingarinnar, Viðreisnar, Pírata og Vinstri grænna um Barnabókamessu

Skóla- og frístundaráð leggur til að haldin verði Barnabókamessa í samstarfi Reykjavíkur Bókmenntaborgar UNESCO og Félags íslenskra bókaútgefenda þar sem kynntar verði nýjar íslenskar barna- og unglingabækur. Fulltrúum grunnskóla og leikskóla í borginni verði gefinn kostur á því að kynna sér bækurnar, ræða við höfunda og útgefendur og þeim verði tryggt sérstakt fjármagn til að kaupa titla að eigin vali fyrir bókasöfn starfsstöðvanna á sérstöku kynningarverði. Barnabókamessan verði haldin dagana 12-13. nóvember og verði nánari tímasetningar og staðsetning send út við fyrsta tækifæri. Skóla- og frístundasvið leggi fram alls 9 milljóna kr. viðbótarfjárveitingu til grunnskóla og leikskóla sem þau geti varið til bókakaupa á messunni.

Greinargerð

Á árinu 2017 gengu skóla- og frístundasvið Reykjavíkurborgar og Félag íslenskra bókaútgefenda til samstarfs um verkefni til að glæða áhuga barna og ungmenna á bóklestri. Ákveðið var að efna til viðburðar í lok október sem fékk heitið Barnabókamessa, þar sem nýjar barna- og unglingabækur voru kynntar, með áherslu á nýjar bækur eftir íslenska höfunda. Skóla- og frístundaráð samþykkti 7 milljóna króna viðbótarfjárveitingu til skólasafna og leikskóla af þessu tilefni og gafst þeim því kostur á að bæta bókakost sinn með því að panta bækur á messunni á sérstöku kynningarverði. Mikil og almenn ánægja var með Barnabókamessuna 2017 og komu fram margar óskir frá skólunum um áframhald á þessu samstarfi. Hagstæð kjör og sérstök fjárveiting skiptu miklu máli til að allir nemendur gætu notið þess að fá nýjar og skemmtilegar bækur þegar mesta umræðan er um bækur rétt fyrir jólin. Starfsfólk skólasafnanna lýsti yfir ánægju með að hægt væri að skoða allar nýjar útgáfur á einum stað auk þess sem tækifæri gafst til að ræða við höfunda og útgefendur á staðnum. Tillagan felur í sér að framhald verði á verkefninu á hausti komanda, afgreiðslutíminn verði aukinn og þjónusta við fulltrúa skólanna sömuleiðis með fjölgun afgreiðslukassa til að mæta þeirri miklu eftirspurn sem reyndist vera meðal skólanna. Lagt er til að Barnabókamessan 2018 verði haldin mánudaginn 12. nóvember og þriðjudaginn 13. nóvember og verður fulltrúum skólasafna grunnskóla og fulltrúum leikskóla boðið að sækja viðburðinn. Tímasetning messunnar í ár tekur mið af því að þá má ætla að flestir útgáfutitlar verði komnir á markaðinn en hægt verður að panta allar bækur sem tilbúnar eru til afhendingar á staðnum. Lagt er til að viðbótarfjárveiting til grunnskóla og leikskóla vegna Barnabókamessunnar verði hækkuð í alls 9 milljónir króna á þessu ári.